



Broj: 02-6307/22
Sarajevo, 29. 11. 2022. godine

Na osnovu člana 69. i 120. Zakona o visokom obrazovanju („Službene novine Kantona Sarajevo“, br. 36/22), člana 104. i 214. Statuta Univerziteta u Sarajevu i odredbi Pravilnika o dodjeli počasnog zvanja profesor emeritus Univerziteta u Sarajevu, Vijeće Univerziteta u Sarajevu – Ekonomskog fakulteta na sjednici održanoj 29. novembra 2022. godine, donijelo je prijedlog

ODLUKE

Da se Šain dr. Željku, penzionisanom redovnom profesoru Univerziteta u Sarajevu – Ekonomskog fakulteta, dodijeli počano zvanje profesor emeritus Univerziteta u Sarajevu.

O b r a z l o ž e n j e

Vijeće Univerziteta u Sarajevu – Ekonomskog fakulteta na sjednici održanoj 29. novembra 2022. godine, razmatralo je inicijativu Katedre za finansije da se počasno zvanje profesor emeritus dodjeli profesoru Šain dr. Željku.

Prof. dr. Željko Šain, rođen 30. 12. 1954. godine u Kaknju, od početka studija ekonomije na Univerzitetu u Sarajevu – Ekonomskom fakultetu 01. oktobra 1973. godine do dana penzionisanja 30. septembra 2022. godine neprekidno je prisutan u nastavnim i nenastavnim aktivnostima Univerziteta i Fakulteta. Od prve godine studija je bio u studentskim organizacijama, a od druge godine studija pa do diplomiranja 22. 06. 1977. godine, demonstrator na Katedri za matematiku i statistiku – predmet Privredna i finansijska matematika. Puni radni odnos na Fakultetu zasniva u maju 1980. godine kao asistent pripravnika na Privrednoj i finansijskoj matematici, a u zvanju asistenta i višeg asistenta je biran još na predmete Aktuarska matematika i Finansijski menadžment (koji su se tek počeli izučavati na Ekonomskom fakultetu osamdesetih godina prošlog stoljeća). Postdiplomske studije i odbranu doktorske disertacije obavio je na Ekonomskom fakultetu u Sarajevu.

Prvi u istoriji BiH doktorirao je iz aktuarske matematike (2004. godine) na temu: „Optimizacija i upravljanje premijskom rezervom životnog osiguranja“. Iste godine biran je za docenta na Katedri za finansije i Katedri kvantitativne ekonomije i predaje veći broj predmeta na svim ciklusima studija. Sijede izbori u zvanja vanredni, pa redovni profesor na istom Fakultetu, odnosno Univerzitetu.

Pored Ekonomskog fakulteta, oko dvadeset godina predavao je i na Prirodno – matematičkom fakultetu Univerziteta u Sarajevu, na prvom i drugom ciklusu studija predmete: Uvod u finansijsku matematiku, Uvod u aktuarsku matematiku, Finansijsku matematiku i Aktuarsku matematiku. Također je predavao više akademskih godina na državnim ekonomskim fakultetima univerziteta / sveučilišta u: Zenici, Mostaru, Tuzli, Banjoj Luci, Istočnom Sarajevu, a povremeno je gostovao i na ekonomskim fakultetima u Zagrebu i Beogradu. Biran je i za gostujućeg profesora Beogradske bankarske akademije Univerziteta „Union“ u Beogradu.

Profesor Šain je objavio veći broj knjiga kao autor, koautor, redaktor – autor, redaktor – koautor, glavni i odgovorni urednik, na lokalnom i engleskom jeziku. Također, objavio je veliki broj naučnih i još veći broj stručnih članaka u referentnim i priznatim publikacijama (zbornicima radova, časopisima, raznim pisanim i elektronskim medijima). Recenzirao je veliki broj univerzitetskih i drugih knjiga, zbornika, članaka i sl.

Trg oslobođenja – Alija Izetbegović 1, 71000 Sarajevo, Bosna i Hercegovina, Tel: +387 33 275 900, Fax: +387 33 275 963

ID 4200494560236; PDV 200494560007

www.efsa.unsa.ba



EFMD | BACHELOR

Bio je mentor na više doktorskih disertacija na univerzitetima / fakultetima u: Sarajevu, Zenici, Tuzli, Mostaru, Banjoj Luci, Istočnom Sarajevu itd. Na preko stotinu magistarskih i završnih radova bio je mentor na više univerziteta u BiH. Mentorisao je više stotina diplomskih i drugih sličnih radova. Utemeljio je na Ekonomskom fakultetu (prvi u BiH): (a) akademsko izučavanje, na prvom i drugom ciklusu studija, veći broj predmeta iz oblasti aktuarstva i osiguranja, (b) magistarske i master studije iz aktuarstva, aktuarstva i osiguranja, (c) Centar za islamsku ekonomiju, bankarstvo i finansije (dio realizovanog dekanskog programa rada profesora Šaina), (d) akademsko izučavanje islamskog osiguranja tekaful, (e) koutemeljitelj je Centra za menadžment i informacione tehnologije (MIT Centar), Centra za menadžment i informacione sisteme (MIS centar) i E-net centra (f) koutemeljitelj Akademsko – strukovnog udruženja internih revizora u BiH.

Utemeljio je rad Agencije za osiguranje u BiH (na osnovu Zakona iz 2004. godine). Veoma uspješno učestvovao je sa svojim ili koautorskim radovima na brojnim naučnim i stručnim skupovima u BiH i inozemstvu.



Ubrzo nakon diplomiranja (1977. godine) izabran je za člana Savjeta Ekonomskog fakulteta (sadašnja alternativa je Upravni odbor), a onda su slijedile, tokom cijelog radnog vijeka gotovo sve funkcije koje su značajne za ovaj Fakultet: sekretar Fakulteta (u ratnom periodu 1992–1995), prodekan za nastavu (1995 – 1997), pomoćnik (zamjenik) direktora MIT Centra (1994–2004), v.d. direktor E-net centa (2003-2004), direktor Poslovne škole Fakulteta (2004–2006), prodekan za finansije / izvršni direktor Fakulteta (2006–2008), dekan Fakulteta (2012-2016), prorektor Univerziteta u Sarajevu (2016–2018) i cijeli niz manje značajnih funkcija unutar Univerziteta i Fakulteta.

Izvan Fakulteta i Univerziteta, profesor Šain je obavljao niz značajnih javnih funkcija: član Upravnog vijeća Centralne banke BiH (2009–2015), prvi predsjednik Upravnog odbora Agencije za osiguranje u BiH (2006–2009), predsjednik Stručnog savjeta Agencije za nadzor osiguranja Federacije BiH (2012–2017), član Odbora za ekonomiju Odjeljenja društvenih nauka Akademije nauka i umjetnosti BiH, član brojnih upravnih i nadzornih odbora i drugih stručnih tijela. Svoje konsultantske stručne radove iz oblasti ekonomije obavljao je u oko 250 pravnih lica u i izvan BiH.

Na osnovu izloženog Vijeće Univerziteta u Sarajevu – Ekonomskog fakulteta, na sjednici održanoj 29. novembra 2022. godine, podržalo je prijedlog da se počasno zvanje profesor emeritus dodjeli profesoru Šain dr. Željku.

U skladu sa Pravilnikom o dodjeli počasnog zvanja profesor emeritus, navedeni prijedlog upućuje se dvjema članicama Univerziteta u Sarajevu – Prirodno-matematički fakultet i Fakultet političkih nauka.

Na osnovu izloženog, donesena je odluka kao u izreci.

 DEKANESA

Prof. dr. Jasmina Selimović

Akt obradio: Jasmina Bajrektarević, poslovni katedarski rukovodilac


Akt kontrolisao: Hadis Šuvalija, rukovodilac Službe za pravne i personalne poslove


Akt odborio: prof. dr. Eldin Mehić, prodekan za nastavu
